



El tschalèr dil museum san ins tedlar e mirar in'installaziun ch'ils scolars dalla 2. e 3. superiura han fatg ellas lezziuns da romontsch.

FOTOS AUGUSTIN BEELI



Luis Coray duront ina performance el stil da blues, davositer ils utschals ed ils maletgs tier la tematica dils tuns e dallas colurs dils tuns.

Polischet e merlotscha el museum

Dumengia ha la squadra dil Museum da Laax inaugurau l'exposiziun nova.

Quella dat envesta ellas treis tematicas: poesia, utschals e colurs. Tuttas treis ein colligiadas en tun e maletg.

AUGUSTIN BEELI/FMR

Luis Coray, il musicist e pictur-artist da Laax, ei representaus cun ina retscha da maletgs abstracts. El ha luvrau cun sias colurs, ha seschau inspirar dil cant dalla merlotscha, dil polischet, dalla lodola e d'alters utschals. Ina roscha da quels ein exponi ella sala dil museum. Las gruppas d'utschals empagliai e las serias da maletgs

en tuns verds, blaus e cotschens fuorman ina simbiosia. En quella metteva era Flurin Camathias sia lirica. En biaras da sias poesias ha el mess ils utschals, ni ina specia specifica, el center. Dumengia ha il curatur Andrin Schütz rendiu attent a quei, utschals seigien ambassadurs dalla natira e simbols da libertad. Els sedistinguen cun fermas vuschs, ni era finas e sensibilas, tuns autls, ritmica e grondas coloraturas da

chors. Enten planisar l'exposiziun dalla stad 2021 han Andrin Schütz e Romana Brunold, la menadra dil museum, seschau influenzer da tals scenaris. Il team ha priu en salv la collecziun d'utschals ch'era entochen ussa ella casa da scola Grava. Cun quella ha gl'artist Luis Coray creau ina seria da maletgs.

Ella sala dil museum san ins admirar in'installaziun sensitiva entuorn

quei, sch'ins pren peda per visitar l'exposiziun, eis ei tuttavia in scuviera. Ina tala fan ins era giu el tschalèr d'arviul dil museum. Leu ei l'installaziun dallas scolaras e dils scolars dalla secunda e tiarza superiura dalla Scolaviva Laax. Ellas lezziuns da romontsch, tier scolast Adrian Catbomas, ein ils juvenils s'occupai culla lirica da Flurin Camathias. Sco Luis Coray dils utschals,

han els seschau inspirar dallas poesias, han documentau e raquintau historias entuorn quellas ed il poet da Laax. Ins auda ils scolars a discuorer e raquintar, vid preits san ins veser fotografias dallas gruppas che han luvrau vid quei project pil museum da Laax. Gl'atun vegnan ils medems juvenils a cuschnar e survir el museum tratgas dil temps da Flurin Camathias.